

## Canzone Nustrale

# A Funtana di Muraccioli

A Muracciaschi bravi  
e curali.. Dolce ricordu!

1

Ghjente di li *Muraccioli*,  
Statevine alegra e sana  
Datevi còre, o figliòli  
Un calate più mattana!  
Principianu tempi nòvi  
Tira la nostra funtana:  
La surgente di *Simone*  
*Oghje sposa u so cannone!*

2

Per cavà st'aqua tercana  
Da le rinfie di li pini  
Chi cavalcanu a so tana.  
Armati di violini  
Per ghjunghjela a netta piana  
Strippendu monti e vaglini,  
Franca di danni e di sbagli  
Ci vòlse molti travagli!

3

Per fà appruvà lu disegnu  
E perviene a bôni fini  
Ci vòlse tenace ingegnu,  
Piani, rinchieste, e rinchini!  
Ci vòlse aduprà l'impegnu  
Per fà smiscià li quattrini  
E còpre, in grossu, le spese  
Da lu Guvernu francese!

4

Messu ci avemu lu prezzu,  
L'un si pô cuntà buggia!  
Ma, lu *carru di u Prugressu*,  
Dôpu tanta trigheria,  
Quì, passa e piglià pusessu,  
Boga la so marcanzia!  
S'ellu ci affacca suvente  
Pruspererà roba e ghiente.

5

Per l'impres'e lu tracciatu,  
L'un si circò furisteru:  
In Corsica rinumatu  
**Prosperi** fù l'ingigneru!  
Di u travagliu incaricatu  
**Simongiuvanni**, furieru!  
E tutti li paisani  
Stati ne sò l'artigiani.

6

Un annu fà, cu i calori,  
Un ci paria mancu vera,  
Li nostri travagliadori  
Aprinu a longa trincera.  
Chi sbattimentu di còri!  
Lu paese aspetta e spera!  
Ma, l'un ghjunsenu i tjò,  
E lu travagliu piantò!